



Maiu 2022

Mensajen husi Austrália nia Embaixadór ba Timor-Leste, Bill Costello



Ha'u marka loron 100 nu'udar Austrália nia Embaixadór ba Timor-Leste no ha'u hein atu fó benvindu ba Governadór-Jerál Austrália nian, Sua Eselénsia Jenerál o Honorável David Hurley AC DSC (Retd), ba Timor-Leste. Governadór-Jerál sei hamutuk ho ita atu partisipa iha cerimónia investidura ba Dr. José Ramos-Horta nu'udar Timor-Leste nia Prezidente tuir mai no selebra aniversáriu dala 20 ba restaurasaun ba independénsia Timor-Leste nian.

Tinan 20 hafoin Timor-Leste selebra ninia restaurasaun ba independénsia iha tinan 2002, Austrália no Timor-Leste konstrui ona parseria ne'ebé maka profunda no dura. Parseria ida ne'e la'os bazeia de'it ba faktu ne'ebé hatudu Austrália nu'udár nasaun viziñu ne'ebé besik liu, maibé ida ne'e hanesan rekoñesimentu ida katak ita-nia povu no ita-nia futuru iha ligasaun ne'ebé forte tebes. Iha área seguransa, estabilidade no prosperidade mak sai parseiru fundamental ba malu.

Bainhira pandemia COVID-19 mosu ba dahuluk no fó ameasa maka'as ba pesoál sira-nia vida iha fatin-fatin, Austrália fornese asisténsia médiku boot no apoiu barak seluk hodi ajuda proteje saúde no seguransa povu Timorese nian. Austrália mós sai hanesan doador vasina ba COVID-19 ne'ebé boot liu ba Timor-Leste, hanesan doze AstraZeneca no Pfizer sira ho montante millaun ida resin.



Iha tempu Páskua 2021, bainhira inundasaun grave akontese iha Timor-Leste no obriga ema rihun sanulu resin tenki sai husi sira-nia uma no hamate ema 30 resin, Austrália hanesan baibain mantein iha ne'e no fornese apoiu. Iha semana hirak tuir mai hafoin inundasaun, ami entrega asisténsia umanitária tonelada 86 no mós materiál médiku liuhusi voo RAAF no komersiál sira seluk barak hodi bele mai to'o Dili.

Maibé parseria entre Austrália no Timor-Leste ida ne'e la'os deit atu fó apoiu ba malu iha tempu krizi. Ita-nia lasu ne'e metin liuhusi ida ne'e. Nasaun rua ne'e kompromitidu atu hari'i ekonómia forte no próspere ne'ebé sei bele apoiu empregu no kria oportunidade ne'ebé dura ba ita-nia foin-sa'e sira.

Governu Austrália no Timor-Leste daudaun ne'e servisu hamutuk atu realiza projetu infraestrutura transformasionál klase mundiál nian iha Timor-Leste. Purezemplu, Austrália daudaun ne'e apoiu Timor-Leste atu hari'i kabu telekomunikaun sub-marina entre Austrália no Dili ne'ebé maka sei fornese ligasaun internet ho velocidade a'as ba konsumidór no negociante sira hotu iha rai laran. Konektividade ida ne'e sei kria oportunidade foun ba negociante sira atu bele fa'an sira-nia produktu internasionalmente no ba konsumidór sira atu bele asesu saida de'it mak mundu fornese.

Austrália mós servisu hamutuk ho Japaun no Banku Aziátiku





ba Dezenvolvimentu atu reabilita Aeroporto Internasionál Dili nian. Ho medida volume tráfegu aéreu ne'ebé aumenta, ida ne'e sei fornese Timor-Leste ninia konektividade boot liu ba mundu, hodi loka dalan ba produktu Timor-Leste nian ba iha merkadu ne'ebé boot liután. No Austrália maka nasaun primeiru ne'ebé maka iha konkordánsia ba akordu bilateral ba servisu aéreu iha Timor-Leste, no ninia rezultadu mak agora iha ona voo sira entre Darwin no Dili. Mobilidade traballadór nian proporsiona benefísiu ekonómiku ho valór boot ne'ebé sei fó benefísiu ba nasaun rua ne'e. Traballadór Timoroan ne'ebé halo ona viajen ba Austrália atu servisu iha to'os, matadouru, viveiru no área empregu sira seluk, sira la'os deit manán saláriu ne'ebé haruka fali mai Timor-Leste hodi apoia sira-nia família, maibé manan mós kompeténsia no esperiénsia sira seluk. Bainhira traballadór sira ne'e fila mai Timor, sira bele utiliza sira-nia kapasidade hirak ne'e hodi hahú negósiu foun, ne'ebé sei tulun sira hetan rendimentu ba sira-nia família no comunidade. Iha tempu hanesan, negosiante Australianu sira mós manan tarballadór Timoroan sira ne'ebe maka iha kapasidade aas hodi tulun prienxe fatin mamuk hirak ne'ebé mak Austrália prezisa iha sira-nia área. Atualmente Timoroan hamutuk 1480 mak servisu iha Austrália no sira mós husu Timoroan 1669 resin atu ba halo servisu seluk tán iha tinan ida ne'e.

Austrália mós fó apoiu ba Timor-Leste atu proteje Timor-nia soberania. Iha tinan oin, ami sei fornese Ró Klase Guardian rua ba Komponente Marítima F-FDTL nian. Ró rua ne'e hari'i espesifikamente atu halo patrulla iha Timor-Leste no sei fornese kapasidade atu monitór no proteje Timor-Leste ninia zona marítima ne'ebé sei kontra peska ilegal no krimi transnasionál sira seluk. Ami mós kontinua atu hadi'ak kapasidade PNTL no F-FDTL nian liuhusi ami-nia programa kooperasaun polísia no defeza ne'ebé mak la'o kleur ona.

Ita hotu iha ligasaun husi ita-nia kompromisu ba rejiaun no apoiu ba estadu de direitu. Austrália nu'udar apoiudór iha tempu naruk ba Timor-Leste ninia aspirasaun atu sai membru ASEAN no WTO. Nasaun rua ne'e deklarara ona sira-nia apoia ba soberania nasaun Ukránia nian, no ami mós fahe kompromisu ba direitu umanu nian.

Iha tinan 20 deit hafoin restaurasaun independénsia, Timor-Leste halo ona mudansa maka'as hanesan nasaun ne'ebé livre, independente no demokrátika. Hateke ba futuro, povu Timor-Leste nian bele fiar katak Austrália sei kontinua hamriik hamutuk ho imi, fó apoiu atu hari'i Timor-Leste sai nasaun ne'ebé forte, prósperu no seguru liu.



Hodi mantein atualizasaun ba desenvolvimento nafatin tuir ami-nia pájina Facebook 'Australia in Timor-Leste.' Ita bele hetan edisaun ikus ba boletín ne'e iha ami-nia sítiu.

A Rua Mártires da Patria, Dili, Timor-Leste | P (670) 3322 111 | F (670) 332 2247

E austemb_dili@dfat.gov.au | W timorleste.embassy.gov.au

[@AustralianEmbassyTimorLeste](https://www.facebook.com/AustralianEmbassyTimorLeste) | [@AusAmbDili](https://twitter.com/BillCostello)



Australian Embassy
Timor-Leste

